

# إنت متورط معايا

أشرف عتریس

لا إله إلا الله

إلهي .. بسم بني ..

وكل صحابي (الرحم) جرداً ..

هريكم نزيهني ..

جسدك ما أقدركم (أبيكم) نوحوني ..

أشرف

مفتتح

قبل كده ..

شغلت دماغك و نرفتلك بمعرفتي ..

دلوقتي إنت فعلا متورط معايا غصب عنك ..

المشاكسه و الشقاوة و الخريشة و نكش الأفكار في النافوخ و الرهان لسه شغال ..

شكرا للمساحه دي اللى بتقرب بيننا ،،،،

Ash-

● يااااه ...

كان باين عليا التعب ولوني مخطوف ..  
مكتتش لسه أدمنت السهر و الشاي الثقيل و التدخين ..  
لكن درج مكنتي كان مليون صور هلكت صحي ..  
ياما قفلت على نفسي الأوضة بالساعات و أمي بتدعيلي بنجح مقاصدي ..  
كان صدري مفتوح و ضلوعي تتعد من القميص زي ما تكون كراييج سوداني ..  
الحاجة الغريبة إني مكتتش فاهم يعني إيه ثانوية عامة و أولى جامعة ..  
لكن كنت فاهم يعني إيه شاعر مشهور و له كتاب عليه إسمه ..  
دي أول قصيده قلتها في حفلة ..  
دي ثاني هدية من بنت خالتي لما جت من إسكندرية ..  
دي ساعة المرحوم أبويا ..  
دي نضارة شمس من السعودية كسبتها في رهان مع صاحبي لما فاز الأهلبي بالكاس ..  
دي خبطة أمي على الباب ..  
ده صوئها الممطوط ( عارفه كويس ) لسه بتدعيلي  
ربنا يتوب عليا من الحبسه في الأوضة لوحدي و أنا عريان ..  
بحاول أعدل من نومتي بعد ما الصبح دخل فجأة !!

●●

●● يعرف يكون حريف طاولة و عبقرى فى الشطرنج و شاطر فى البوكر من غير حظ ..  
يعرف يكذب و يضحك و ينام و يشتغل أى حاجة تجيب فلوس عشان يلبس الغالى..  
و يعمل دماغ ..  
يعرف يتكلم فى الكورة و الجنس و بنات الإنترنت ..  
و كارت الكاما بتاع الدش و شريحة الموبايل..  
عارف قيمة اليورو كويس فى سوق العملة و يحلف بكتاب ربنا ..  
إن الخلق دى ما يستاهلوش غير كده ..  
يعرف يسمع مزيكا من كل نوع يعرف يستوعب حاجات ياما  
لكن لما جرب يحب ..  
طلب منى أكتب له جواب عن حاجات قالها بصعوبة  
لأول مرة بيسألنى يعنى إيه ...  
إحتياج - ضعف - توأمة - شراكة عمر !!!!

●●

● أنا واحد مش عادي... يا حبيبي

دأبما من ضمن الناس المكتوب عليهم وجع الدماغ

أحياناً... بنملا فراغ العالم بفلسفة كل حاجة لغاية ما يضيق علينا الراح غصب عنا

فببقى ممنوع علينا نبتسم في وش عيل شقي أو بنت حلوة بتضحك على أبوها لما تقول له :

.. (بحبك قد البحر ..

بحبك قد الدنيا بحالها إنت وربنا... ماما حلوة زي العروسة بتاعتي ) ..

مسكبه يا بنتي .. أصلها ما تعرفش إن البحر مليون ملوحه و شكله بيخوف بالليل

والدنيا بحالها مش ملكها .. حتى ماما الحلوة عروسة بمكياج وقت اللزوم

أما ربنا... بيحبها لحين ما تدرك فعلها وسبب الخطيئة يوم أكل التفاحه..

ساعتها هتعرفي ليه يا حبيبي إحتياجي بالشديد لواحدة عاديه... زيك!!!



●● (فرق السما والأرض ) إنك تعشق ذاتك ف واحد صاحبك له ملكات خاصة جدا  
وبين واحد مش صاحبك كل نضاله ف كيفية الصدام مع غيره...  
(هاجس ) لما يسيطر عليك فترة كبيرة وياخذ من وقتك ٣/٢ الراحة اللي بتحاول  
تسرقها غصب من الدنيا فتحس بإنك مضطر تنفي (الأخر ) من غير ما تتأسف...  
تشتاق على صاحبك الحقيقي تلقاه جايب سيرتك في المسرح وشعر العامية ..  
وغناوي الطلقه وشلة الأتيليه والدخان الغالي بتاع العريش ..  
اللعنه... على كل من يشهد بكتاب الولد التافه  
اللعنه صابت صاحبي اللي لسه بيشهد لي بالمقام العالي غصب عن عين الجميع..  
بين السما والأرض... أنا وصاحبي بنخلق وجود بيتحقق  
مش وهم ولا عقدة نقص ولا قويا مركبة  
ولا فشل متأصل في أمة بني هاشم  
من قبل ما يتولد النبي أشرف الطيبين !!

●●



يجوز ضرب العلاقة اللي بينك و بين صاحبك مسألة وقت ..  
يجوز فرض الحصار اللي عليك بإسم الجواز محتاج تعود ..  
يجوز إحساسك بالإحتلال من ناحية شغلك مجرد ملل ..  
يجوز تدمير خطة المسرح في الثقافة الجماهيرية عبارة عن لخطبة مالكش فيها ..  
يجوز اللي هينسف كل الأوهام دي حد غيرك ..  
بس الأكيد إنك محارب قديم ..  
و تقدر تستحمل لغاية ما تبان الصورة قدامك و يسقط النظام ..  
ساعتها .. هتجب حاجات أكثر بفوضوية أشد من كده  
و تقدر تعيش حياتك من غير ما تقرب أو تخون !!





هو الواحد كان ممكن يتكلم على طول بعد ما يتولد !!!؟  
 طب فيه حد بعد طهوره ممكن يتحوز من بنت عمه اللي قد أخوه الكبير ؟؟ !!  
 يعني الواحد ممكن يدخل الجيش و هو لسه في سنة تالته بالمدرسة الإعدادية المشتركة ..  
 أنا نفسي أشرب سجائر في حصّة الدين مع إنا بكرة طالعين رحلة لزيارة سيدنا الحسين  
 عشان نشوف المقام ...  
 و صاحبي عايزنا نروح نحضر فيلم ضرب ..  
 عايز أفكر مين اللي قاللي ..  
 ممكن تحب البنت بتاعتك على راحتك في الحمام و تقولها ( إن شاء الله هنتحوز .. )  
 إنت فيك شئ لله بس هتموت ناقص عمر ..  
 ممكن يلبسك جن مصور فتصبح رفاعي و تيري الوطن من ذمتك ..  
 إنت عيل كبير قوي و أبوك كان ناشف زي الزمن ..  
 أبويا مات مرتين و كان بيعيط يبقى محدش يعرف أبويا ..  
 طب إشمعني الدكتور سين في الجامعة مش هوه بنفسه اللي بره الجامعة ..  
 مش فاكر حاجه ..  
 غير حد بيقرا عليا الفاتحه (بسم الله )  
 و بيعتم .. الجته لسه ساكنها المرض ..  
 الجته لسه ساكنها المرض ..

••

كانت أول مرة ..

أيوة أول مرة بتعرفي قيمة نفسك ..

و تحبي الدنيا بجد و تشوفي الناس بتشهد لك من غير ما تشمت و لا تعير و لا تفتح سيرة  
ما تتففلش على جرح غويط جداً جداً ...

أول مرة ..

تعشقي ذاتك فيا و تلعي زمن غيري ..

أول مرة ..

بتحبي لحجل البناويت اللي في سنك  
و تحسي بإنك إنسانه بتحب .. لآخر مرة .

••

●●  
معنديش مانع ..

أسافر بره لو ضاقت جوه و قفلت زي الدومينو  
هسافر لو قلبي حلف لي إن أمي خلاص كرهتني نخالص  
لو شفت في عين البنت المجنونه بتاعتي دمعة ندم و لعنه لكل أيام الشقاوة معاها ..  
ما عنديش مانع ..

أبطل شعر و مسرح و تدخين و شاي من غير ما تجيني غيبوبة ..  
مستعد ميقاش حزين لو أمسك طرف الخيط يدي لو حد يشاورلي بصوت حقيقي  
بس يكون عارف إسمي كويس جداً ..

معنديش مانع أستقيل من الحزب و أهجر بيتنا اللي إتعودت عليه من صغري ..  
هسيب جسمي في أي حته و أقطع كل صحابي لو أضمن حد يشتريني بغلاوة نفسي -  
اللي بعشقها من غير تجريح و لا لوي ذراع و لا فصل ندالة يضرب في نافوخي الدم فيسيح  
و تفرق مساحة وجودي اللي بمحاول أخلقها بمعرفتي من غير ما أتهدل ولا أسمح لأي حد  
مهما كان يشاركني في حزني الخاص بيا لوحدي ..  
مستعد .. معنديش مانع .. لو يحصل !!

●●

••

خللى بالك ..

الراجل ده إنت تعرفه كويس ..

دأبما لابس بيجاما كستور مخططه و بالطو ما بيقلموش حتى في الصيف

أول ما هيسلم عليك هيعيط .. هيكش في بعضه و الهدوم تبقى واسعه عليه ..

متحاولش تساعدو و تمد إيدك في جييك ..

إوعى بيان عليك حزنك و عينيك ترغرغ لما تكشف إنه حافي -

و دمه ناشف على جلده ..

ابتسم له و إسمع كلامه لغاية الآخر ..

مالك كده .. شكلك حزين جداً زي اللي عنده إكتئاب

مش عايز ترد عليا السلام .. طب بتعيط ليه دلوقت ؟؟

أول مرة أشوفك لابس بيجاما كستور من غير جيوب من غير زراير

من غير ما تأخذ لبالك إن الفانلة عليها بقع زيت و شاي ثقيل حتى السجاده غرقانه دم !

إنت قابلت مين بالظبط يا جدع إنت ؟؟!

••

●● بابا ..

معملتش الواجب .. أصل الدنيا كانت فوضى  
وقفونا طوابير و بعد كده طردونا من غير ما نأخذ حاجه  
أنا ضعيف في الحساب و عايز درس خصوصي  
ما تسألنيش عن الشهاده أنا بحب الموسيقى و الرسم ..  
مش هذاكر .. هو كل حاجه ضرب .. أنا عيان و عندي صدام ..  
نافوحي بيزن .. مش عايز ليه توديني جامعة إسكندرية ..!  
مش عايز أطلع مدرس ألعاب  
مبجيش الرياضه .. الحسبه دي مش في دماغى ..  
مش هروح الجيش هاهرب على بلاد بره ..  
صدقني من غير ما أحلفلك  
بابا .. مكنش قصدي ..  
حاول توقف جوايا إحساسى بالزمن ..  
ما تزودش حيرتي و ضعف أمي ..  
بلاش تبعد وشك ..  
بابا غمض عينيك بقى و إرتاح في نومتك .. قلقتني  
من ٨٧ و أنا مش قادر أزورك ..  
بابا .. نسيت أقولك .. أنا آسف ●●

●●  
(ويحق لك .. تدخل ببيان الروح قامن بحزني ) ..

مجدي يا جابري ..

مش فاكربي .. أنا صاحبك أشرف عتريس ..

أنا أول واحد شفتك بتعشق الخواديت زني عينيك

تحكي لي ع اللي حصل (بالظبط كأنه حصل ) معرفش له حسيت إنك عيل شقي  
و مزعج لكن ما بتعرفش تكذب ..

قاعد تصيد حكاية ورا حكاية بغمزة عين في (أغسطس )

ساند ضهرك للحيطه و بتضحك ضحكه ناعمه تحت شيش البلكونه ..

ترعق : " يا عيال النثر و الكتابة الجديده

بلاش تموتوا شهدا .. الأحسن تموتوا م الغيظ "

معرفش له إفتكرت ساعتها عياط أبويا لما ماتت ستي ..

كانت آخر مرة يضربني بعصاية الغلية و يجري ورايا بخرطوم الحمام

لما فتحت التلفزيون و قعدت أضحك على نجيب الريحاني في ( غزل البنات )

أنا كنت نسيت الحاجات دي من زمن بعيد يا مجدي ..

صدقني ..

آهي حدوته من دمك نحدث من وجعنا .. آخر نفس .

●●

## مكالمة - ١ :

آلوه ..

أنا جاي القاهرة بكرة ..

خدي أي حاجة من عندكم رايحه المعجوزه

إنزلي قدام مسرح البالون هتلقيني معايا آخر قصيده كتبتها لك

و ناكو شيكولاته و خير لسه طازه يستاهل نحتفل به سوا ..

خدي بالك .. آلو ..

مش هسمح لك تبصي في ساعتك و لا هقدر أخبي عياطي

متحاوليش تسألني عن حد غيري .. أنا عازفك بتموتي في الرغي

و تشبيك الصوابيع و شرب القهوة على البستان و الضحك بصوت عالي

لما تيجي سيرة الشقاوة ..

الله .. لو لسه فاكركه الطقم اللي شفتك بيه أول مرة ..

إنني عارفه كويس إني ما بحبش لون الروج يطلع في وشي ..

كفاية زبدة الكاكاو .. و ريق صابح .. و تنهيدة شوق ..

إستغفرك

••

## مكاملة- ٢

آلوه .. بكره جاي ..

في نفس الميعاد و نفس المكان بتاع المرة اللي فاتت

- سامعاني ولا الصوت بعيد -

حاسس لما هشوفك هأخذك في حضني و الناس كلها هتطوف حوالينا ..

الشارع هيتلحبط و العربيات هتعمل ثورة كان نفسنا نشارك فيها ..

الراجل العجوز هيتسم ١/٢ إبتسامه فتبان سنايه الصفراء ..

البت بتاعت الثانوي هتضغط على صدرها أوي و تعض على شفايفها و بتاع المناديل

هيصفر صفارة طويله هتشبك مع صفارة عسكري المرور

عسكري المرور ..

الوحيد اللي هيلعن لحظتنا و يسب لبتوع السيما و الأفلام ..

آلوه .. سامعاني ..

مش ممكن تكون النمرة غلط

مش ممكن تكون الحرارة إنقطعت كده مرة واحدة ..

آلوه.. من فضلك يا آنسه ..

جربي تاني نفس النمرة .. عشان خاطري !!!

••



●● أول بروفه للكتاب الجديد بتاعي لازم تتراجع في الهيئة .. يعني مفيش مهرب من مشوار سفر  
لمصر بمصاريف تطير نص الفرحة اللي إتأخرت خمس سنين ده غير خلفانك على المصحف  
الشريف قدام اللجنة إنك مش شيوعي ..  
ولا مخير من أمن الدولة و لا جاسوس على صحابك و لا بتسب الدين على أي حاجة  
و لا مخنوق طول عمرك و إنك فنان ييحب الشعر و التجريب مع صحابك المزعجين جداً  
اللى بيكتبوا عن ذواقهم بكل ما فيهم من نقص و عيوب من غير حجل ..  
فهمت ولا نقول تاني من أول و جديد ..  
مش مهم المراجعة  
معييش فلوس عشان أسافر  
خمس سنين تسد النفس عن كل حاجة ..  
هكتب إقرار لكن مش هحلف إني مش شيوعي  
صحابي مزعجين لكن أنا أكثر منهم  
الفرق الوحيد إني بحب الحجل (شوية) !!

●●

●  
مين ..؟!

مين اللي قاعد على قلبك لطالون .. ؟

مين اللي واقف على راسك و إنت بتصلي ..؟

مين اللي بيجري في دمك و إنت نائم .. ؟

مين اللي بيتنطط في نافوخك رغم إنك مرمج من زمن بعيد ..؟

مين اللي بيشدك من جوه الحزب و يشاور لك على الشارع .. ؟

مين اللي دائما بيفكرك بسيرة المرحوم أبوك .. ؟

مين اللي بيعرف يأخذ من لسانك صوت الشعر .. ؟

مين اللي بيعرف يستفزك في عز إحساسك بالأزمة من كل شيء ..؟

مين اللي بيعمل كل ده من غير ما يتألم و لا يزعل و لا يحاسب نفسه ..

و لا يحس بالذنب و لا يستغفر ربنا ولا يعد لروحه الغلطات .. ؟

و لا يفكر حتى ينتحر عشان يرتاح؟؟

مين ده اللي شبهك الخالق الناطق و مغير إسمه بالقصد ؟

يطلع مين ده اللي إسمه سين ؟؟؟؟؟

●

● خذ قلبي عهدده من غير ما تخاف مني  
خللي صوتي أمانه عندك لغاية ما نعوزه سوا  
هات عينك عشان أشوف نفسي مطبوط  
حوش بيدك ضرس العقل اللي جتني عن الأول  
خذ جلدي القديم و سيب الجرح يتوف  
هات طرف العدوذة و خذ مسك الختام  
أنا مقدرش أسيب روحي تجري لقدام من غير ما تمسك فيك  
زي النار ..  
و ضربة الشمس ..  
و السلك العريان .. !!  
●

●● جدي كان صاحبي ..

لكن أبويا كان شريك مخالف..

لما صاحب يهمس في وداني "البنت لما تفور ما ينفعش تتجيس "

تلقي الشريك يناقر على قد جهده معايا "الفرسه الطلوقة تقدر تخصيه "

معرفش ليه كنت مشغول أعرف الحاجات دي بنفسي

و لغاية دلوقت الحاجة اللي محيراني لازم أجربها و أشوفها بعيني

البنت زي الخيل و الولد لسه عفي محدش نط فوق كتفه

الولد يشبه لي و البنت من بلد تانية فيها البحر بيعلم الناس أصول العشق

ملعونته الصدفة اللي خلّتي أشهد على الفعل لما حصل قدامي

من غير ما يبان عليّ أي إنفعال سوسيوولوجي

غير إني أسند دماغي على الحيط و أعض في ضوافري بعيد عن الناس

يمكن حد يقرأني نفسياً و يأخذ سري فيحلف :

" الحجر الداير لايد من لظه "

●●

● مشهد العفاريات اللي بتاكل رز مع الملايكة مش راضي يطلع من نافوخي  
يمكن عشان النور مش والى و العتمة عاملة كوردون حوالين الأوضة ..  
بس أنا مش نائم و كل ما أحاول أنعس بيحيني إحساس إنني هومت  
تحت عجلات القطر الأسباني بتاع الساعة واحده ..  
على العموم البطاقة بتاعتي تحت المخلدة  
إكمي عارف اللي هيحصل بعد خمس دقائق من دلوقت  
يعني ممكن البطل التراجيدي يدخل و معاه قتابل مولوتوف  
هيهددني و هو بيقرقز لب كابوريا  
مش هتنازل عن عربية شروكي لما يساومني أرمي الطوب اللي في إيدي  
و أبطل أغني غناوي هيفاء وهي لما كانت قالعه هدموها خالص ..  
مقدرش أموت من غير زبطه مقدرش أموت من غير مشاكل  
مقدرش أموت من غير علامة لكن هضطر أموت م الخوف بعد دقيقة من دلوقت ..  
ستاند باي .. احسن .

●●

معرفش أءارب لوحدي ..

معرفش أموت كل يوم ..

معرفش أهرب ،،

معرفش أعيط ،،

لكن أعرف أغني ..

لوحدي ..

كل يوم ..

و أهرب ،،

أعيط .. معرفتي

أءارب، ..

و أموت ،،

بيد !!

●●

● بماي ..

لا سارقاني السكينه و لا محموم عندي سخونه ..

أرجوكي إفهميني من غير زعل ولا قهرة ترفع ضغطك و تعلی السكر ..

منيش عيل في إيده لعبه و فرحان بيها .. دي و جهة نظر مزمنة زي بصمة اليد ..

لازم كل سنه أحضر المعرض و المؤتمر العام و مهرجان المسرح و لقاء الجامعات ..

و احتفاليات التجمع و دورات تدريب الكوادر الثقافية حتى الورش الفنية للهناجر

و كرنفالات السينما و إنتخابات إتحاد الكتاب ..

و كل الحاجات اللي زي كده ..

مبعرفش أحضر دفنة ميت ..

مبحش زحمة الأفراح ..

مليش في الزيارات العائلية ..

ربنا يشفي كل مريض .. يا رب كل البنات اللي في العيلة تتجوز بعيد عني

صديقي .. الرحمة تجوز علينا إحنا و اللي مات خفّ عنه الحمل

دي السكه الوحيدده اللي بأعرف أمشيها عشان أقابل الحياة ..

قبل ما الضغط عندي يزيد و تجيني سخونه زي أبويا على غفلة

و ملحقتش شربة المية ●

••

دخل السايبر ملقش جهاز فاضي .. راح قعد في الركن الثاني بعدما حجز ساعة واحده  
play station و دفع تمنها مقدماً زي ما يكون (محبكها) على نفسه قوي ..  
إختار فريقه بسرعه هيلعب فردي ضد فريق (الأحلام) ..  
عينيه بتخرق شاشة التلفزيون قاصد يأذي (ريفانولي ، روماريو ) !!  
الماتش hard و التشكيل هجومي إيدته بتضغط على الزرار بعنف ..  
حاسب ده طرد و سبع كروت .. إزاي هيكمل الماتش اللي مش ناوي يطلع منه draw  
لأنه برفض الوقت الإضافي و صفارة الحكم و قسوة الجمهور ..  
الحاجه الغريبه إنه غافلني و (هرب ) لما حس إني براقبه  
و عيني عليه من أول دقيقه ..  
مع إني كنت ناوي أصاحيه .. أعزمه على شاي خفيف (بتعتاع )  
لون شكل الملعب و لون الترنج سوت بتاعه ...

••



●●  
للأسف .. مكتبي الخاصه مفيهاش كتب عن القانون

سلفت مرة الإذاعة شرايط كاسيت و تسجيلات نادرة بس معرفتش أستردها ثاني ..  
زي ما تقول وقفت قدام القطر ألعن عبط الغلابة و ريحة عرق التيشيرت للبنات اللى لحمها  
رخيص و صوت العيال اللى بتعيط على طول إكمنهم بيفكروني بغاوة الموظفين و غرور  
الظباط و طمع العساكر و الحرامية و تهديد المخبرين لأي حد ماشي في الشارع ..  
متسألنيش عن كذب الشيوخ و كلام الجرايد و مذكرات الساسه صحاب الكروش ..  
أصل عندي عقده من حيث الفلاحين و اللسان الطويل للصعايده و نصب القاهريين  
وعوجان لسان بتوع إسكندرية اللى مالوش لزمة ..  
طول عمري بمحاول أكبر عن تدخلات الأهل و ندالة الصحاب لكن فشلت بشكل غي ..  
إنت نفسك مزعج زي كلاكس العربيات طول النهار و زحمة المرور حتى في الأقاليم ..  
صدقني عندي إحساس إن يوم القيامة قرب و اللى بيحصل ده إنكتب باليد الشمال يعني  
وجع دماغ و عيشة سوده و مشروع قصيدة نثرية مش عايز يكبر  
الله يجازيك يا أخي ..  
لما شورت عليا بالكتابة و سألتني .. إزي الحال ؟؟ !!

●●

العيال المزعجين صاحبك ..

الواحد منهم غاوي حوارات و مزاولات و شغب مالوش آخر ..  
حقيقي الصوت عالى و القلب جري و اللسان طويل و الدماغ ناشفه بس مليانه يجد  
لكن على المستوى الإنساني فيهم طياه و طهر و حزن و حلم صعب و قلة حيلة  
وصدمات و جروح و إحتياج بالشديد و زهق من كل حاجه ..

إلا .. الكتابة ..

الكتابة و سماع بعض في أي حته في كل وقت إنشالله يكون في أسانسير الهيئة العطلان  
تطلع مع صاحبك تسأل عن كتابك في السلسلة الجديدة و آخر عدد من المجلة الوحيد  
المهمة اللي بتنشر العامية ...

تستلم الشيك بتاع آخر مسرحية تلقى صاحبك ..

فايت في الحديد و ساحبك وراه .. أصله صحفي في كام جورنال ملهمش لزمه و ماحدش  
يعرفهم غيره مع إنه خريج تجاره و مدخلش الجيش مش متجوز ولا ناوي يعملها..  
إنت مستغرب ولا حاسس بالقهر و لا غيران و لا زعلان على روحك ..  
و إنت اللي نص وزنك كرامة و النص الثاني نفخه كدابه مع إنك مش تحين ولا حاجه  
بس عارف قيمة نفسك كويس ..

في الوقت المناسب تبقى مارد جبار ..

لو أي حد ملحد حب يشهد بالحق هينطق إسم الله ..

من غير ما ينكر إيمانه بيلك ...

•• قابليني ..

إن شاء الله قيامة الدنيا تقوم دلوقت ..

مش مهم تحسي حساب حاجات محسوبه أصلا غلط على الأقل من وجهة نظرنا ..

متخافيش غير على إحساسك باللحظه معايا و إياكي تحجلي من شرك ..

أصل لا هي جريمه و لا عيبه و لا خطيه ..

مين يسمح لنفسه يراقبنا و يرصد خطواتنا هتجاسبه أكيد ..

محدث يقول إن الدفا في حضن الناس و الحلم في عز النور ما يصحش

الزمن هو اللي عاصي و مذنوب و بيغلط في حق ناس بتعشق من غير ما تخاف

قابليني يا غبية و جميلة ..

في المسافة اللي بين عمري و عمرك حتى لو كانت ضيقه ..

لكن تساع إثنين زينا .. إفهميني

قبل ما يشمت فينا الند الغيران و صاحب المصلحه و الكداب ..

و قليل الأصل اللي بيشتتم و يعاير

خللي بالك ..

إوعي ننكر بعض 🌟

هيه .. لابس بادي كت و فوقها سلوبيت جيتر  
هوه .. لابس شورت أسباني و صندل و مضفر شعره  
هيه .. بتشرب مور  
هوه .. بيشرب سيجار هافاني .. ليهم حق يتكلموا English  
و مسعود شومان واقف في القلعة بيحلف لي إنهم من رو كسي  
بس متأمركين و مضروبين باللغة ..  
يعني دي ممكن تكون جدتها فلاحه محمود مختار  
و هو ريخته زي ريحة محمد أبو سويلم بتاع يوسف شاهين  
دنا جاي من الصعيد أتكلم عن النكسه و لقمة العيش و الطواير و مصيبة بغداد و العيال  
صحابي بتوع المحلة و المنصورة و بور سعيد و السويس  
لسه مهمومين بحكايات الأرض و العرض و اللي يخون منه لله ..  
مش عارف ليه الواحد بعد ما قلبه ييموت يرجع يحن للعياط !!  
لانا عارف أبطل بكأ ولا قادر مطبطين ع العيال اللي من دوري ..

قوللي يا مسعود .. مين اللي خطوته أثقل من ٦٧ ؟!

طب مين اللي هيشهد لك هنا في القلعة .. في المحكى وحي الشعرا .. مين هيصلي وراك ..

إزاي اموت براحتي و أختار المطرح اللي على كيني !!

ما تأخذش في باللك ولا تزعل مني أرجوك

ما يحسكش غير اللي مكتوم زيك

و بيتحرق من غير ما تعز عليه الناس ..

لأنه مش هو اللي يستاهل الحرق !!



سين : هات إيدك ..  
 رفيق : خد عمري بس بلاش تكشر لما تشوفني  
 سين : فين السجاير ؟!  
 رفيق : إنت غاوي تحرق دمي و تحسسي إني معرفتكش لغاية دلوقت ؟؟  
 سين : شايف الورم اللي تحت عيني ده ؟!!  
 رفيق : نام زي مخاليق ربنا ما بتنام و يوم الجمعة صلّي زيّ .  
 سين : تعرف إيه عن اللي تحت الأرض ؟!  
 رفيق : حياه و موت  
 سين : إدعكلي سدري و شمعي عرقك  
 رفيق : هاتفوق إمتى ؟؟  
 سين : لما تنده علّيا ..  
 قطع - صمت طويل - صوت من خارج الكادر  
 (اللهم بدل أحوالنا و لا تكن علينا يا أرحم الراحمين )

رفيق : هات إيدك زي ما خدت بيدك  
سين : حس بجزي من غير ما تهرّب  
رفيق : خذلك سيجارة تاني  
سين : الدخان هيعميننا إنت مش شايف  
رفيق : عينك في عيني  
سين : تشبه محاليق ربنا في كل حاجه ماعدا النظارة دي ..  
رفيق : إحنا لسه في الأرض ولا في السما !!!  
سين : ما تفرّقش  
رفيق : إدعكلي سدري- أنا شامم عرقك- إلحقني - ها نفوق إمتي  
سين : لما حد ينده علينا من غير ما يجرح !!!!!

●●

● البت بتاعتي ..

كل يوم عينيها يتغير عن أول يوم عرفتها  
أصل اللاترس ده حاجه غريبه قوي و إختراع بالنسبه لي ..  
بقى لازم يمشي مع الخلقو الكوليه و الإنسيال و التي شيرت  
و الإستريتش و الباندا و التاتو ..  
طلبت ميني نروح (التكية) عشان تشرب النسكافيه مع الكرواسون اللي بتحبه ..  
كان لسه مرار الشاي الثقيل في حلقي ..  
و أنا حاطط إيدي على كتفها و محاول أركز في مطلع القصيده الجديده  
اللي كتبه إمبراح عشانها و مش فاكر منه حاجه دلوقت ..  
فحدت قرار بحرق الديوان كله ..  
في نفس اللحظة اللي فلتت ميني و من تحت باطي عشان تعدي الكوبري  
و تجر كل العربيات الملاكه على الوقوف و تلخبط الدنيا ..  
فلقيت مصاريبي في الأرض و الريحه فاحت زي ما تكون فتحت تربة قتيل ..  
رفعت إيدي بالإشارة للرصيف و الطريق مدّ !! ●



● خذ بالك ..

دي أول مرة أطلب منك تنسلخ مني ..

تسحب ١/٢ دمي و تلبس روحي ..

تسكن سري و تعشق جسم البت بتاعتي تشاركني مزاجي

و تلمس جسمي في الرعشة معاها

تشم عراقي - تنشفه بمنديل مبلول بعرقها

في لحظة رعشتها الثانية

إنت عارف ده معناه إيه ؟!

يعني مش لوحدي اللي هاموت فنان و مخلص و غشيم ييحب حد غيره

و مستعد يكتب قبل ما يموت على غفلة من غير ما يقول لصحابه :

"أنا .. أشرف عتريس

عاشق نفسه جداً .. بعديكُم

هل عنديكُم مانع ؟؟ "

●

● وحدي ..

على سريرى من صغرى ..

بالحلم المتكفن جوايا ..

بحزنى القنم ..

بوجع الكتابة فى الليل و فى كل وقت ..

وحدي ..

و النوم تخاطيف النوم القلق النوم الذى بيحيب تعب ..

و هدة الحيل الذى بتخللى البت تهرب منى ترفرف بعيد ..

تسكن فى حضن غبرى

و حدى هاموت ..

رغم عيون صحابى و لطفة أمى و حضن حبيبى ..

عارف وحدى هاموت لكن ...

● مش هتخش النار لوحدى .....●

نسخ الديوان الجديد بتاعي محتاج وقت ..  
 حتى الناقد اللي هيكتب الدراسه مش فاضي ..  
 أما زيارة طبيب الأطفال عشان بنتي مهمة جدا ..  
 ومراتي محتاجه وقت عشان تغسل هدومنا اللي قربت تخلص من الدولاب ..  
 يعني لازم أستحما .. مفيش فايده  
 مهرجان مسرح الجامعه هيتدي و مخرج الثقافه محتاجني ..  
 مشوار مصر عشان صرف الشيك مهم خالص ..  
 صاحبي المطرب حاجز عشر ساعات في ستوديو .. مقدرش أعتذر ..  
 البطاقة بتاعي قديمه و الباسبور إنتهى ما ينفعش ..  
 ميعاد القضية بتاعت عبد الستار سليم ضد الشاعر الحرامي آخر الإسموع ده ..  
 ولازم أشهد بالحق ...  
 طب ربك و الحق لو إنت مكاني هتعمل إيه ...!!!  
 من غير قهريج و لا سخرية و لا تكبير دماغ ..  
 ما تقوليش إدعك الفانوس و لا جدول المسائل عشان ترتاح من غير مزاولات ..  
 دنا خايف أعمل كده يطلع لي عسكري معاه ضبط و إحضار قدام البيه و كيل مصلحة  
 الضرائب بخصوص إقرار الذمة المالية بتاعي للسنوات الماضية ..  
 ساعتها .. هتلاقيني عندك رافع عليك السلاح من غير كلام  
 بس أرجوك .. سيبي أنام شوية !!! ●●

● إنت نبي و لا ملاك؟؟

بذمتك يا شيخ .. بتعرف تنام من غير ما تحايل فيه كل ليلة ؟

وحياة اللي راح منك غصب هتقدر تراضي بي ؟

نفسك تفك لسانك معايا بس مش قادر .. مش كده؟؟

إنت متأكد إنك بتصلي كل يوم لربنا بس؟؟

عايز تقنعني إن الهدوم الحريمي دي بتاعة صاحب الشقة المفروشة

اللي إنت قاعد فيها من عشر سنين و زياده ..!!

فاكر لما أبوك مات .. أمك حزنت عليه بعدد شعر راسها اللي شابت ..

إنت كنت هربان فين ؟!

لما سألتك عن الجنس قلت لي .. حرام

لما سألتني عن الجواز قلت لك .. جنس و حاجات تانية تهد الحيل

أنا مش نبي و لا ملاك و مبعرفش أناام خالص

تفتكر مين فينا اللي يستاهل الرحمة و المسامح كرم ..

أنا و لا إنت و لا المرحوم أبوك!!!!

● ●

فتحت عنيا لقيت نفسي بحبك  
 إحساس الغيرة من أي حد قريب منك معرفتش أنخلص منه طول عمري ..  
 في المدرسة .. عشائك كنت متميز و زمايلي بيحسدوني عليك  
 لما كبرت شوية عرفت قيمتك رغم إنشغالي ببنت الجيران من وره الشيش  
 و الخريم اللي بتكره حر الصيف و تنام في الصالة ..  
 في الجامعة .. عيني كانت بتشوف ياما ..  
 نكن مقدرتش أنخطى حدود الصحوية و العلاقات النضيفة  
 واحد صاحبي خد باله و إهتم بموضوعي ..  
 فعطاني كتب فرويد و حكى لي حكاية (أوديب )  
 في الحلم .. نو شفتك حزنانه أقوم عايط  
 حتى صحابي بيحبوكي جداً و أهل الشارع بيوصوني عليك ..  
 فتغاظ منهم غصب عني ..

معرفش ليه كنتي دائماً  
مثيره لأفكاري ولكل قصايدى ..  
موجوعه بحزني ..  
مبسوطه لضحكى ..  
مغروره بيا "رغم عيوبى" و رغم حداثة سنى و لسانى الطويل و دماغى الناشف !!  
يمكن أشبهك فى ملاحى ..  
جائز ينادونى بإسمك يوم القيامة ..  
طول عمري واخذ منك كل حاجه يا غالية .. مانا إبنك  
ومراتي بتشهد إني بحبك من غير ما تزعل و لا تغير و لا تحاسبني ..  
بس تملىلى تسأل نفسها ...  
هو ليه دائماً عصبي معايا و بيرجع طفل يقوللى يا ماما !!؟

●●

● لسه ممكن تروح أي حتة و تستخى مع نفسك عشان الفصايح  
و الإحساس الخطير بإنك محتاج تخلص من ذنب معمارتوش غير إنك حيّ  
و بتتنفّس على مهلك ..

حاسب على جسمك و بلاش الرعشة دي لما نيجي السيرة ..  
لو عدى عليك صاحبك دلوقت هيلايك جاهز و مستعد ..

يعني مفيش فرصه لوداعك غير مراجعة آخر قصيدة كتبتها إمبارح  
قبل ما تقفل عينك لآخر مرة و إنت شايف مصيرك زي اللى مكشوف عنه الحجاب ..  
جوز خالتك طيب ... لكن لا العلاج نافع ولا الدكاترة أطيب منه ..

و محدش ناوي يطيب جراحه في معهد الأورام ..  
بس اللى ملفت للنظر إن الدكتور النبطشي كاتب تقرير على بياض  
جاهز على التوقيع عشان تصريح الدفن !!!!

يعني يادوب إسم المريض و تيجي تأخده بنفسك تلقى الكل في إستقبالك  
أولهم الراجل اللى شال ١/٢ شباب البلد و عواجيزها و برضه مفزوع زيك بالظبط  
رغم إنه ييفتح خمسين كفن في اليوم الواحد !!

تعرف .. واحد بس كان شجيع زي بتوع السيمة .. هو جوز خالتك  
اللى مكنتش خايف و السبب إن مراته قالت له :  
"روح .. مسمحاك يا شوقي .. مع السلامة " !!!!!

●

••  
ما تزعلش يا عم طه ..  
إمبارح كنت في بالي .. شفتك بتضحك زي عبد الغفار عوده و تعيط زي المليحي  
كأني بشوفك لأول مرة بتعمل بروفه من نار و حسك جايب آخر الدنيا ..  
مش عجباك البطلة اللي بتاكل نص كلامها من وره ضهرك ..  
و المخرج المساعد بتاعك خايف منك موت  
إطمن يا فتان .. العرض لسه و اللحنه عارفك من زمان كويس ..  
بلاش تحرق دمك مع ناس مش محترفين بلاش تحلف بالغالي تبطل شغل  
بلاش تسب و تلعن للثقافة الجماهيرية و بتوع المسرح ..  
بلاش تمسك سماعة التليفون ..  
بلاش تورطني في كتابة جديدة ..  
بلاش توعدي بالشريحة الجاية في دمياط ..  
كان ممكن تنهاود ..  
كان ممكن تعمل نص ثاني ..  
كان ممكن تلغي السفر ..  
لكنك صممت تموت ولا يهملك  
و مشهد موتك معرفتش أكتبه و لا حلتش فينا مصدق  
كيف هنتغل من غيرك مسرح !!  
••



●●

قابليتي .. زي أول مرة

إن شاء الله تنطبق السما على الأرض ..

مش هتغيب إبتسامتك الهادية رغم زحمة أفكارك

و لا رغبة عينيكي في إكتشاف ملامحي بسرعة هتنقص مع إنك مرتبكه جداً ..

و لا رغبة إيديكي هتتحمّد من تلح كوباية الليمون

فبلاش تعملي حاله من حالات الهياج و الدغدغة المتعبة لحواسي المتعطلة بفعل الزمن ..

فتلغي حضورك ..

و تلعني غيابي ..

من غير ما تلاحظي إني جاي أضملك لآخر مرة ..

قبل ما نموت ..

دي مش أول مرة بموت في الحلم ..

و بقوم على غفلة مش فأكر أي حاجه ..

غير إني بيعيط على ميت كان بيحب الدنيا الواسعه

مع إنه كان نفسه يعذب نفسه بنفسه و بيكره طرف السرير !!!

●●

●● ليا صاحب مغرم بتصنيف الناس على طريقته و حسب رؤيته

مره قاللى إني شبه الشمس ..

و بنت بتحب الجنس وصفتني بالبحر ..

أما حكاية حيي للصيف و كرهى للقمر معرفش ليها سبب

مع إني حاولت أوجد علاقه بين كل ده و بين الخيانة و القلق و الوضوح

و حب الذات و عشق الوطن و الخوف من ربنا ..

و الرغبة في الضحك بصوت عالى لما يكون بمجد ..

حاولت و فشلت ..

ياااه ... معناته إيه كلام أبويا و أمي و صحابي

(إنك عيل مزعج و طيب لكنك هتعب قوي )

تفتكر إن ده سبب رغبتى في الموت بمزاج

من غير أمر رسمي !!

●●

••

أول ما تحش المكان و النية خالصة لله  
نفسك تلقى حاجه واحده تستاهل تحترمها  
فتقابل حد يجب إنه يكشف عن حقيقة مشاعره قدامك  
يمكن رأيه يهزك فتتصدم ..  
عشان محدش فاضي لحد يتفق معاك على مشروع بيتدي تنفيذه  
بعد كل الكلام اللي هتقولوه على طول ..  
زي ما تكون الناس خلصت حواليك و الواجب تعلن فشلك بكل صراحه  
إنت .. ملقتش حد  
همه .. مش موجودين  
و المكان زحمه بالكذب ..  
الله يلعن المختلف ع المهتم ع المصنف ع المشغول بوجع الدماغ  
تحيل نفسك بعد ٢٠ سنه هتبقى عامل إزاي ؟؟  
لو ملقتش حد فيهم يستاهل تصاحبه بمجد  
بشرط تحي علامة التميز و تنسى إنك فنان .. قدامه !

••

●●  
أنت يا .....

الحاجه اللى بتعرف تعملها بقسوة .. نفذها  
إحكم و إتحكم على كيفك .. مارس ضغطك أكثر ..  
طول عمرك بتساوم و في نفس اللحظة تهدد بكل ما عندك  
بتمنح و بتمنع و تشاور بعينك الفاجرة إنك تقدر تفتح عليا نار جهنم  
تظلم أو تنصف .. عمرك ما هتقدر تعدل في الحاجة المائلة بقالها سنين  
ده طبعك و إنت إتعودت ما حد يحاسبك ..  
و لا ترجع مهما تكون غلطان ..  
دانت ساعات بتبرر فعلك بشراسة ..  
كأنك مستني اللحظة اللى هتعلن فيها عن كسرة نفس صاحبها  
علشان تشمت أو تتعجب إنك راكب فوق ضهره  
مع إن الصوت بيثن .. بس ناوي يحرق قلبك  
راضي عن نفسه ؟!

●●

● خاب ظني ..

كنت فاكراً الواحد ممكن يصد الزمن اللي راجع بظهره ..  
و يلحق يشد طرف ديل السنين اللي واخده في وشها قاصده البعيد ..  
طب ليه الناس بتتسند على بعض زي ما تكون بتحجي خافقه تمد الخطاوي  
أحسن بيان عجزها قدام العيال الصغيرين !!؟؟  
طب بقية الناس اللي واقفه في عز القيااله  
وجاهزة عشان تصلي ورايا هتعرف تشاهد عليا  
من غير ما تلعن جرحي الحبي و حزني المالح ألف لعنه فتحرق قلبي ...  
قلبي اللي شال التقايل طول عمره عشان خاطر محدش فيهم يلبسه صوت العياط ..  
يا بووووووي كيف الواحد ما تعز عليه نفسه  
بعد ما يعرف إن الروح حلوة و ليها ريح خفيف  
لا تستاهل مشنقة و لا نكران جميل ؟؟  
لكن اللي يستاهل اللي طلع البحر في عز النوة  
يرجع مجبور .. جايب مطايب تملا العين  
و أغلى من لبن العصفور ..  
يستاهل !!!

●●

●● خايف حد يشوفك... ليه ؟!

هو إنت الوحيد اللي بتجري وره لقمة العيش وتشد فيها بالعافية  
علشان بطلت تروح الحزب تمارس نضالك الحقيقي علشان تعرف تأخذ موقف  
مش يمكن كتابة قصيده أو مسرحية أحسن من قراية كل الجرايد ..  
عايز تعرف ليه بالظبط الـ...

الناس... غاية

اندنيا... طول عمرها طاحونه

صحابك... مش كلهم طيبين

أمك... بتدعيلك أكثر من الأول

أنحوك... ما تغيرش لسه بيكره القراية وكلام زميلك الشيوعيين

وسيرة جمال عبد الناصر ..

إنت... بتحاول تتصالح مع نفسك وتصاحب مراتك

عايز ليه تقابل المحافظ و تكلمه ثلاث ساعات بعيد عن المكتب؟!!

مين هيسمح لك تقول الحقيقة في وشه؟!

غير الراحل اللي رايح الشغل بالبيحاما وشايل كل الجرايد على قلبه  
مع انه امبارح كان في التجمع بيعلم عن كرهه للشارع و المحافظ والفلس  
و الحياه كلها مدام محدش راضي يسمع آخر قصيده كتبها !! ●●

●● شكل الحياة كان إيه قبلنا ..؟؟

مش برضو كان فيه تخاليق بتحب و بتكره و بتموت م الخوف ؟

يعني من الأول و هيه كده ..

لون فاتح و لون غامق و حاجات كتير تشبه لبعضها

زيك و زبي ..

طب كان اسمه إيه اللي يحرق دمي و جسمه كان ورام شوية ؟!

طب كان بيتحرك و لا كان صورة في برواز ؟؟

طب مين اللي عقد النية على موتي من غير ما يتهز و لا يجراه حاجه ؟؟

هو صحيح أنا بين عينيك مسافه تشهد باللي خلقتني ..

مشبهش حد ..

يعني لحم و دم ..

طب إنت هتموت إمتى بالظبط ؟!

عشان عايز أفرج عليك ●●

● ممكن يكون الشارع كش..

و البيوت تساوت ببعض ..

بس الناس اللي جواها مش همه دول اللي تعرفهم ..

أصلهم بيتكلموا لغه غريبه عليك أولها شفرة و آخرها غمزة بنص عين ..

فتلقى العملة اللي في إيدك ملهاش فايده غير لما ترن ع الأسفلت ..

أما الحاجة الوحيدة اللي هتقف عليها و تحلف بالغالي عليك ..

هيه عتبه روحك و إنت بتتنفس باصص فوق

حاسب .. أحسن تنخطف منك فجأة

لما تشوف الموت جوه عينيهم بيشدك تحت ●



••

في العتمة ..

البسمة محدش بيحس بيها ..

و اللون جنب اللون يختفي ..

حتى الصوت بيخاف فيروح ما يرجعش ..

أما الروح .. هيه اللي بتسحب نفسها و تطير ..

لحياة ثانية خالص ..

ما فيهاش غير البهجة ..

إنشالله تكون تحت الأرض .

••

●● من هنا ..

في ميدان عبد المنعم رياض

من قلب الأحداث من قلب ميدان القتال أعلن الآتي :

يحيا نضال الشعب العامل في فينسيا و سويسرا و بيفرلي هيلز اللي زيكم بالظبط  
أنا البطل التراجيدي اللي خطف أطفال العالم الثالث إنتقاما منهم كي أعرف أتضامن  
مع قوات حفظ ماء الوجه ضد الإحتلال الجنسي للأزواج و الزوجات الشواذ في بلاد  
الإسكيمو و نجوم قارة أستراليا ..

إكمي من أهل الخطوة هبقى هناك بعد دقيقه

في حديقة الخانكة / ٢٦ الجبل يسعدني أعلن ترشيحي عضوا منتصبا

بقامتي و هالتي و عليائي في منظمة مكافحة فقر البورصة من أصحاب الأرضدة

و السندات و الأسهم اللي ممكن تخرب بيت أي حد فينا ( الشربره و بعيد )

بيضحك على الحكومة من غير ما تشوف سنانه ..

نعم

إنه التاريخ و الجغرافيا و فنون فك الشفرة و كيميا الجسد

لا بد من قفل الشباك وفتح الباب عشان تيار الهواء

هذه هي حكمة كونفوشيوس قبل ما يأخذ الحقنه

و العيار اللي ما يصيبش يدوش على رأي تروتسكي

عفوا يا أحبائي..

اللي عايزني يجيني أنا هناك..

طالیا الخ ..

••

بنتك بطلت تستحي من حد  
حتى الواد معدش بيخاف من ربنا  
إنت بس اللي عاشق و نفسك تبقى فدوة للمحبين ..  
زي ما تكون شايف نفسك يوم القيامة داخل الجنة في حضنهم  
قاعد تبل صباغك تفر الورق على مهلك من غير ما تقرا المكتوب  
بعيون مطفية وقلب بيغلى م الغيظ ..  
طب حسني و لمس بيدك على طرايف قلبي ..  
خدي لحضنك يمكن نقدر ننعم سوا من غير ما تستحي  
من عيون الفجر اللي عرت جسم الليل بشويش  
من غير ما تحس بالعرشة مع صوت الأذان  
إنت بس اللي مش عارف ..  
إن شيش البلكونه لسه مفتوح و البت سهراته  
حتى الغايب لسه مجاش من بره ..  
فبلاش تقوم دلوقت تلعن نفسك جني  
و تقطع الورق الفاضي اللي مكتبوش على مهلك زي كل يوم  
قبل ما يهرب دمك الليلة و تحل روحك من أي وعد ..

••

● يادي منطق الفشلة .. اللي بيتهموننا بيه  
يادي الحقد الطبقى .. اللي مكتوب علينا زي القدر  
يادي حجة البليد .. علّونا و كسرتم نفسنا قبل الأوان  
لو سألنا هو النجاح إيه بالظبط ..؟  
بيترد علينا بالإشارة و الحرس يعني معناها ننكتم ..  
لو قلنا الناس اللي غيرنا تعرف شكل البريزة و الربيع جنبه  
نبقى "بيشة ، عشوائيات " و آخرنا مساكن الإيواء ..  
أما حجة البليد اللي فينا لما يتكلم عن الشرف و يحلف بالذمة ..  
معناها إيه نار الغلاظة لا تنطفي ولا تبقى رماد  
طب ليه حرس الحدود واقفين على جنة الكبار بالسلاح ..؟!  
الواحد لازم يتعالج عند أكبر دكتور في البلد عشان تبقى فيه نتيجة كويسه  
بس خايف لما يسألني عن الحكومة من دولة أجنبية صديقة معرفش أرد ..  
خايف أتلهبط و أقول كلام شيوعيين ..

خايف ردي يكون ساذج و عبيط و محدش من الدكاترة يرضى يعالجني  
زي دكاترة التأمين الصحي ..  
هيجب تقرير من المدير بتاعي و توقيع زمايلي ..  
إني بطلع الأول في كل حاجة ..  
و الثورة مقدرتش تأمم أبويا لغاية دلوقت ..  
أما مثلي الأعلى في الحياة هو "فلان الفلاني"  
الراجل التريه اللي يده و دماغه نضيفه جداً اللي بيحلف ع المية تجمد  
إني زي الفل و أستاهل العلاج على حسابي ..  
و آدي ختم الوزارة ..  
و آدي شهادة الشهود العدول ..  
و آدي بصمة الكف على القفا .. يعتمد "  
خالى من الأمراض و الكفاءة و المواهب المعدية  
زي ما ناس كتير ملهمش لزمة مالىين البلد ●

●●

● شور عليا ..

حد حيرتي و ردني من غير ما تخبي عليا حاجه ..  
دنا جاي من آخر بلاد المسلمين لغاية عندك ..  
مانا صاحبك و عشيرك من زمان  
طول عمري قايس معاك السكه ..  
دايسين على كل صعيب شفناه مع بعض من بدري ..  
من وإحنا عيال بنحب حصه المزيكا و نكره حصه النحر ..  
لغاية ما حلمنا ببنت واحده عريانه بينك و بيني على السرير السفري ده ..  
اللى لسه عليه بقعتين لغاية دلوقت ..  
إنت فاكرني صاحبك من بعيد ..  
ولا إنت صاحبي غصب عني ..  
ولا القرايه و إسم العيله هيه اللى بتزيد العشم بيننا ..  
لأ .. ده عقد شراكه مختوم بنفس الوجع  
بيخليك تقول ما عندك بكل صراحه  
و تخليني أعشقتك بحق و حقيق ●

آخر عشر تيام رمضان .. حمسه في مكه و حمسه في المدينه  
( ولقد خلقنا الإنسان في كبد ) رغم إني حاجر كابينه درجه أولى  
على باخره معجبانيه ملهاس سوابق في العطل و الفرق ..  
لكن حسيت بأن مشوار الشقا بيتدي من وقت طلوعي من بيتنا و لحظات وداع الأهل  
( أخويا و بنتي و مراتي و بعض الصحاب ) ..  
يا الله .. دي ثاني زياره يارب الكون و حسيتي من الوعودين .. أنا و أمي  
يا هلترى الصلاه جوه البيوت زي الصلاه في ربح النبي .. يازحمة المدينه  
شفاعه للفقارى و الخطية اللى زيي مش **طايين** شبك الحبيب  
شفاعه بشفاعه ( كل مكه حرم ) من غير ما نخطي ع الرقاب في الشوارع  
عشان نصلي في الكعبه ربك يسامحو يقبل بس مين يقبل منك سبحة و عود بخور  
وسجادة صلا و عطر عنبري بريح المسك لما ترجع من غير ما يسألك عن هدايا الصين  
أفارقة و هنود و عرب و أتراك و مسلمين من آخر الدنيا .. كله بيعتري بعد الفجر ..  
ناس تسد عين الشمس و تدك أرض اليهود لو خدوهم من الحرم لغاية تل أبيب  
من غير سلاح نووي ..  
الستر من عندك يا عالم الأسرار و الخفايا ..  
كل العباد خطايا و أكبرها محدش بيعتري الآخرة ..  
( عمره مقبوله و حسبك رب القلوب )  
مكه في ١٤٢٦ هـ من عام الفرجه و العوله ٢٠٠٥



يالا نروح ندور عليه عشان وحشنا مش عشان إتاخر  
 من زمان ييحب الليل إكمنه شقي و مصاحب العفارت  
 هاروح أشوفه عند صاحبه اللي يشبهوه بس يارب ما تلخبطش فيهم  
 يمكن يكون قاعد لوحده في العتمة بيضرب كام جوان حباثه عشان يظبط نفسه  
 ساعتها مش هينفع أسحبه بره الشقه و لا أفتح الشبايك ..  
 و لا أضغط على كويس النور ولا أزعق على الجيران و مغيث تليفون  
 يعني كان ضروري يبقى قلبه فرن عتيق مليون حرايق  
 وحفنة نار مرشوشه حواليه ...  
 دي حاجه تخنق لكيني مضطر أستنى ..  
 على بال ما تروح إنت تشوفه عند البت الكدابيه اللي بتطحن عضمه  
 و تمص عافيته و تسحب كل فلسه على قد ما تقدر زي ما تكون بتشفي غليلها  
 من غير ما يستاهل منها أذية و لا سحر محبه و لا غشاوة نظر ، ..  
 ولا بطلان إرادته و لا هدة حيل ..

أول ما تشوفه كبر في وشه ..  
رش عليه مية من غير ما ترعش ..  
تف على شمالك ..  
من غير ما يأخذك نور جلالها فتخطف ..  
لا تبص في عينيها و لا تمس جسمها الطري فتكهرب  
خللى بالك من غير ما تبلع ريقك بالعافية ..  
راهن على قد جهدك و حاول على قد مقدرتك ترجع بنفس القوة ..  
منيش قابل أقيم العزا لواحد ..  
يعني مقدرش أعتبركم شهدا من غير ما أتشاهد على نفسي  
و أشهد بالقيامة لروحي ..  
عشانكم مضطر أتحدى غصب عني كل مظاهر الغيبة اللي طالت ..  
عرفت !!!

●●

● ●  
الله يرحمك يا عم رجب يا بو الحواديت ( عن السياسه و الكوره والعيال الرجاله )  
كان جكواني بألف لسان يغلب كونديرا ، ديكتز ، نجيب محفوظ  
يعني كان لازم تخطي برجلك بره الكون من غير ما تسلفني لسانك  
زي ما تكون إخترت تغيب وحدك بعيد عن الناس ( بيت الفقير مليون بعمه )  
رايح هناك و هتبع رساله بعلم الوصول ( باب الجنه مطرح الغلابه )  
فاكر حكاية الزعيم لما مات و أم كلثوم لما إنقرمت و ضرب المطارات في ٦٧  
فاكر لما هدتني أول شعره بيضا طقت في راسك يا راجل يا طيب ..  
ساعتها كنت بتعيط و تقوللي : الدنيا بنت نيل يا أشرف ..  
( خليك ولد شقي ) .. من غير ما تخاف من البحر  
من غير ما تخاف من النار  
أصل البحر ما يجيش الغرقان و لا النار تقدر تلمس قلب التقى  
طب كيف يا عم رجب الواحد يطمن على قلبه و الحاجات دي حواله ؟!  
طب ليه إخترت تغيب زي الغريب من غير ما تقول ؟!  
و إنت اللي تعرف الواجب .. إنت اللي تعرف الأصول ..  
ليه حلفت باليمين و المحرمات ..  
تخطي برجلك بره الكون في اللحظه دي بالذات .. ؟!  
ليه حاسس إن أبويا هو اللي مات ..  
ليه يا عم رجب .. حاسس إن بقيت غي ؟!

● ●

- قبل ما أنسى العيال المزعجين صحابي المفروض كانت أساميهم تبقى في الإهداء و قبل إسمي كمان لكن بلسم بنتي أغلى من عيني ومنهم نخذت المساحة كلها عشان نقول :  
"عمو فلان صاحب بابا  
له كتاب عندنا في المكتبة بتاعتي "  
ساعتها هبقى فرحان أوى لأني سبت لها ميراث حقيقي و رصيد لا ينفذ ووديعه لا تصرف  
لكن غالية بقيمة الأماظ ..  
فهمتوا دلوقت ليه صحابي غاليين عليا بس مزعجين !!  
مسعود شومان - صادق شرشر - طارق هاشم - يسري حسان - بهاء عواد - مجدي عطية  
حماده عبد اللطيف - جمال حراجي - حسام العقده - مدحت منير - سيده فاروق -  
إبراهيم موسى - سعدني السلاموني - حسين جورج - علاء خالد - شحاته العريان -  
أحمد طه - صالح الغازي - حاتم مصطفى - شريف صلاح الدين - حاتم مرعي -  
محمد الصياد - إبراهيم سلامه - رأفت رشوان - محمود عبد الباسط - عمر طاهر -  
طارق فرّاج - محمد عبد الصبور - حمدي عبد العزيز - مدحت العيسوي .  
و ناس تانية معرفهاش بس فيه إحساس بوجع بعض .. لما تقروهم زبي  
و الشهيد الحقيقي مجدي الجابري ..●

Ash.

## صدر للمؤلف

- ممنوع من الجوازات شعر ١٩٨٨
- حاجة ليها طعم جديد خالص نثر ١٩٩٨
- واحديات شعر ٢٠٠١
- شهدى - سر الولد مسرح ٢٠٠٤
- فلاشات مسرح ٢٠٠٥
- إنت متورط معايا نثر ٢٠٠٦
- حلقة نار مسرح ٢٠٠٦

## تحت الطبع

- جلد الشوارع شعر
- قلب الكون مسرح
- رؤيتى دراسة
- ولد مفتون بالشعر شعر
- المراسلات .... قصر ثقافة المنيا ٢٠١٠ ٣٧٦١٠٩٥

رقم الإيداع بدار الكتب المصرية

٢٠٠٥ / ٢٠١١٩